

LA USC DI LADINS

"Plata dla Union Generela di Ladins dla Dolomites"
Italia – Südtirol – Urtijëi, St. Ulrich, Ortisei
P.IVA IT-00518150214

Neves da la Coprativa de Sèn Jan

N muie de scomenzadives portèdes inant o metudes en program aldò de la osservazioni uzèdes fora tel chestionèr manà fora acà n trat de temp

Sèn Jan - Acà n trat de temp la Coprativa de Sèn Jan aea manà fora n chestionèr con chela de verificà l gradiment di servijes sporc e ge dèr l met ai sozi de portèr dant idees e valutazioni. La scomenzadiva à garatà, ajache de tropes i l' à scrit ite e portà de retorn, e la calità de la osservazioni palesèdes à consentì de meter a jir vèlch mudament che se à jà tacà a veder canche se va a proveder. I oraries del supermercià, avert chest istà da les 8.00 enscin la una e domesdì da mesa les 4 enscin mesa les 8, e de l' Eurospin, avert



Endèna l' Aisciuda Ladina l bar de S. Jan à sport l...

a dò a dò da les 8.15 enscin a les 19.00, i é stac n muie aprijé e ades, aldò de la indicazioni vegnudes fora dal chestionèr, l' é stat metù a jir n nef orarie sperimentèl per chest uton, da les 8.30 enscin les 12.30 e da les 15.30 enscin les 19.15. Su consei di sozi l' é stat ence metù a post l setor di fruc e ortames, che ades l se presenta più rencurà, organisà e derturà, ence canche l' é n muie de jent che proveit, e l' é più sorì ence per chi che laora laite meter fora la marcianzia, che ades anter l' auter la vegn sporta te la neva empacadura bio, un di segnes de atenzion per l' ambient metui a jir da la Coprativa. Autra neva l' é i cesé neves per proveder, più gregn e sorii con la rodeles e i picoi carec per i bec. Per tor ite maormenter la comunanza chisc meisc passé l Fassa Coop à metù a jir desvaliva scomenzadives, desche la vijita coi clienc de l' Ingross ai prumes de jugn a la cèvena Cavit e l domesdì al Sport Hotel Majaré olache n chef de la firma Demetra à cojinà e fat tastèr na cercia de fonghes de sia produzion. Gran suzess à abù l' event "La descorida de la cooperazion", en colaborazion con La Risola, la Mèlga da Ciampedel, la Cassa Rurèla de Fascia e Agordin e l Consorzio Eletrich de Poza, con l' endrez de trei serèdes de formazion e informazioni outes ai joegn per ge fèr cognoscer l mond de la cooperazion, e segur de emportanza l' é stat ence la partezipazion ai prumes de mé a l' Aisciuda Ladina, la setemèna del lengaz, che à vedù l' alestiment aldò de la vedrines e la proponeta per i clienc del bar del disnèr con pan, marmelada da garnetes e smauez e del marendel con pan, Cher de Fascia e ardel. A nivel de strutures chesta aisciuda l' é stat smaorà l piaz dai auti de l' Ingross, percheche l sie più sorì tant per i auti che per i camion e per l davegnir l' é en program i lurieres de miorament te la boteiga de Soraga, olache l' é pervedù l comedament del cuert, la realizazion de na sala con na cèsa da fech da poder durèr tant per la scontrèdes coi dependenc che per scomenzadives coi cheghes o i hotelieres de Fascia e soraldut l smaorament de la boteiga e la colocazion de n portel Bancomat aló da la filiala de Pera che, dò la autorizazioni che l' é debeseegn, l vegnarà metù a jir da la Cassa Rurèla de Fascia e Agordin.

(cri.m)